

**AWIG – AWIG
DESA PAKRAMAN MACANG**



**PERBEKELAN MACANG, KECAMATAN BEBANDEM
KABUPATEN KARANGASEM**

**AWIG -AWIG
DESA PAKRAMAN MACANG**

Om Awignamasta

Awig-awig Desa Pakraman Macang, murdawakia, purwa pangastungkaran titiang krama Desa Macang, ring bukpadan Ida Sang Hyang Widhi maka sangkan paraning dumadi butara batarl sane malinggih ring pura puseh macang, minakadi pura kahyangan sami sane wenten sajeroning wawengkon desa macang, duaning malarapan saking kerta waranugrahan paduka bhatara samudaya, karya puniki kasidan puput. Kaping kalih atur pangayubagian titiang krama desa macang, ping ajeng ring ida dane para panglingsir, klian, pamangku, minakadi ida dane sang maraga cestakara, widagda pradnya wicaksana sareng sami sane sampun sangkaning suweca ledang sareng mapawangun ngrisa uger-uger marupa awig-awig desa pakraman macang puniki, pacang karanggan sepat siku-siku sajroning desa kantos kaungkur wekas. Taler majeng ring pamerintah daerah kabupaten karangasem, para manggalane mastika ngiwang patutang awig-awig, titian ngaturang pangayubagian, duwaning sampun sida nureksa maritetes amastika, ngantos marupa puput. Mungguing dagingipun manut ring tri hita karena indik kahyangan genah ngadisuan Ida Sang Hyang Parama Wisesa. Indik Pawongan pinaka krama desa, indik palemahan pinaka wewidangan wawengkon desa, mabantang antuk likita sastra gama, sasana pasuara, dresta, minakadi sane saosan, sane anut ring pamargin Dharma agama kalih Dharma Negara. Dumadak kasidan mangguhing kajagadithan sakala niskala. Om Santih Santih Santih Om.

**DAGING AWIG-AWIG
DESA PAKRAMAN MACANG**

MURDDHA WAKYA	i
DAGING AWIG-AWIG	ii
PRAMA SARGAH : ARAN LAN WAWIDANGAN DESA	1
DWITA SARGAH : PAKUKUH LAN PATITIS TETUJON	1
TLAS SARGAH : SUKERTA TATA PAKRAMAN	2
Palet 1: Indik Krama	2
Palet 2 : Indik Prajuru Desa	6
Palet 3 : Indik Sangkepan miwah Paruman	8
Palet 4 : Indik Kukul	9
Palet 5 : Indik Paduean Desa Pakraman Macang	10
Palet 6 : Indik Laluputan	11
Palet 7 : Indik Dedosan Patedunan	12
Palet 8 : Indik Baya	12
Palet 9 : Indik Rarampagan	13
Palet 10 : Indik Panyangran Desa miwah Banjar	13
CATURTA SARGAH : SUKERTA TATA PALEMAHAN	14
Palet 1 : Indik Tegal, Bangket lan Karang	14
Palet 2 : Indik Kekayonan	15
Palet 3 : Indik Wewangunan	17
Palet 4 : Indik Wewalungan	19
PANCA MASARGAH : SUKERTA TATA AGAMA	21
Palet 1 : Indik Dewa Yadnya	21
Palet 2 : Indik Rsi Yadnya	32
Palet 3 : Indik Pitra Yadnya	32
Palet 4 : Indik Manusa Yadnya	35
Palet 5 : Indik Bhuta Yadnya	35
SATU SARGAH : SUKERTA TATA PAWONGAN	36
Palet 1 : Indik Rangkat	36
Palet 2 : Indik Belas Makurenan utawi Nyapiang	38
Palet 3 : Indik Balu	39
Palet 4 : Indik Sentana	40

Palet 5 : Indik Wewarisan	40
SAPTA MASARGAH : WICARA LAN MAMIDANGDA	41
Palet 1 : Indik Wicara	41
Palet 2 : Indik Pamidangda	42
ASUA MASARGAH : NGUWAH-NGUWUHIN AWIG-AWIG	42
NAWA MASARGAH : PAMUPUT	43

**Prawa Massargah
Aran lan Wawidangan Desa**

Paos 1

1. Desa puniki mawasta Desa Pakraman Macang, salanturipun nginucap kalih kasuratang sajroning likita, Desa Pakraman Macang.
2. Wawengkon Prabumian Desa Macang mawaneng nyatur desa, manut kadi kinucap ring sor puniki:
 - ha. tepisiring kangin panepine Desa Pakraman Bebandem
 - na. tepisiring kelod: penepi Desa Pakraman Ngis miwah Desa Pakraman Tenganan
 - ca. tepisiring kauh: panepi Desa Pakraman Sibetan
 - ra. Tepisiring kaler: panepin Desa Pakraman Sibetan
3. Sajroning wawengkon Desa Pakraman Macang wenten bebanjaran, luire:
 - ha. Banjar Dukuh
 - na. Banjar Sirang

**Dwita Sargah
Pakukuh lan Patitis Tetujon**

Paos 2

Maka pikukuh, Desa Pakraman Macang ngrajegang, mikukuhin, kalih mitindihan pisan:

1. Pancasila
2. UUD 1945
3. Tri Hita Karana

Paos 3

Desa Pakraman Macang ngamanggehang patitis tetujon, luiripun:

1. Ngutamayang tata cara magama hindu
2. Ngawangunang katreptian sajroning desa pakraman, mangda kasidan rajeg katreptianing praja
3. Ngawerdiang kawicaksanan minakadi kapradnyanan malarapan gumawe gemuh landuhing praja.
4. Ngamanggehang kalih ngawerdiang padruaning desa majalaran ngawicaksanan guna laksana manut Dharma prawerti.
5. Ngrajegang Dharma agama miwah Dharma Negara

Tias Sargah
Sukerta Tata Pakraman
Palet 1 Indik Krama
Paos 1

Sane kasinanggeh krama Desa Pakraman Macang luire:

Ha. Sang sapa sira ugi magenah ring wawengkon desa pakraman macang sane rajeng magama hindu.

Na. Sang sapa sira ugi wed saking desa macang, jenek magenah ring dura desa liwaring desa macang, nanging kanton mipil ring banjar sinalih tunggal sane wenten sajroning desa macang, sane mula pagenahania nguni.

2. Papalihan krama Desa Macang, luire:

Ha. Krama desa murwa inggih punika krama sane ngamel kalih ngelingang tanah wayah desa sareng kalih, dasa diri manut dresta kuna.

Na. krama desa ngarep inggih punika krama desa sane sampun bulangkep sane sampun mipil ring banjar sinalih tunggal sane wenten sajroning desa macang,

Ca. krama unggu inggih punika truna tua daha tua.

Ra. Krama nyada inggih punika krama sane sampun tan keni ayahan luire:

1. Sangkaning kakundulan, antuk santakalaning sane pinih unkur alaki rabi

2. Mabukti sungkan rahat tur sue kantos tibanan, sungkan tan sida waras, tan sida maayahan manut panglokian prajuru desa

3. Sampun mayusa pitung dasa warsa manut panglokian prajuru desa

Ka. Krama desa lanang wiadin istri sane katinggal seda antuk rabine wenten balu camput, wenten balu masantana

Da. Krama ring dura desa inggih punika krama desa sane mawed saking desa macang jenek magenah ring dura desa liwaring desa macang, nanging manggeh mipil ring banjar sinalih tunggal sane wenten sajroning desa macang sane mula pagenahania nguni.

Ta. Krama unggu inggih punika teruna tua miwah deha tua.

Sa. Krama tamiu, inggih punika sang sapa sira ugi saking dura desa, magenah ring Desa Macang, saking liwaring desa macang, madadunung ring pomahaning krama desa, magenah ring pomahaning druen guru wisesa, hotel, miwah saluiripun, maka kubon ngenahin tegal, bangket, nanging kari manggeh makrama desa ring kemulan desania, kabuktiang antuk surat sasinahan saking kliang desania.

Wa. Krama desa Sibetan sane jenek magenah ring wawengkon Desa Macang ngawengku karang pomahan taler kasinangguh krama tania.

La. Sang sapa sira ugi jenek magenah ring wawengkon desa macang, yen tan magama hindu taler kasinanggeh tamiu, tan sareng sapali kramaning agama hindu.

Ma. Tamiu sang sapa sira ugi rauh ka jeroning desa macang, tan nekeh magenah irika, sajeroning arahina ring awengi, sangaraksa patut matur supeksa ring prajuru desa, kalih ring sang amawangan. Yen tan asapunika prajuru desa wenang maritetes yan macihna mamurug awig-awig, pasuara, miwah pamutus para pararem desa, prajuru wenang nundung jadma inucap mangda matinggal saking desa macang.

Paos 5

Ngawit tedun makrama desa ring Desa Macang:

1. Krama desa murwa, sane dados ngentosin inggih punika pratisentana kapurusa pinih nampek paprebahan lalintihe tan cadangga sampun mapandes miwah mawinten tur kapatutang antuk desa.
2. Krama desa ngarep mipil ring sinalih tunggal banjar sane wenten sajeroning desa macang, malarapan antuk tatrangan banjar sangkaning sampun bulangkep saha sampun mawidi widana pawiwahan, sajeroning tigang sasih
3. Krama tamiu mipil ring sinalih tunggal banjar, pakraman sane wenten sajeroning Desa Macang sasampun ipun tigang sasih jenek magenah ring desa macang.
4. Krama desa wit saking desa banjar macang matinggal kadura desa wastu malih mawali ka Desa Pakraman Macang:

Ha. Yan sangkaning rahayu kalih saking palugrahan prajuru desa patinggale nguni, wenang mawali mipil ring sinalih tunggal sane wenten sajeroning Desa Macang, nganutin sukertan banjar punika.

Na. Yan sangkaning tan rahayu patinggale nguni, yogya kliang banjar sane katuju ngatehang ke desa mangde kabaosan antuk prajuru desa. Yan katinutin tatepasan prajuru desa punika tur kacihnayang antuk maguru piduka ring sinalih tunggal pura kahyangan tiga, prasida kalugra mipil pinaka krama Desa Macang.

Paos 6

Usan makrama Desa Macang malarapan antuk:

1. Seda
2. Sangkaning pinunas ngeraga, saha polih palugrahan prajuru desa

3. Tedah utawi matilar saking agama hindu
4. Kasepekang utawi kahaladang antuk desa

Paos 7

1. Swadarmaning krama desa luire:

Ha. Krama desa murwa.

1. Ngrajegang Tri Hita Karana kalih ngemponin saluir pangaci aci piodalan, patirtaan, patoyan ring kahyangan tiga miwah kahyangan desa pedagingan nganggen upon-upon tanah laba pura.

Na. Krama desa ngarep sajaba pangaci aci patoyan, patirtian, pakulon ring kahyangan tiga miwah kahyangan desa sekadi usabha pacaruan desa miwah sane saosan sane dados emponan desa, patut kasanggra antuk krama desa sami, mungguing pedagingan sejaba paweweh desa. Kawijiliang antuk krama desa ngarep.

Ca. Krama nyada dados karahan pacang tedun ke desa yan buat pacang mapepinch, mabebaos, ngewangun sang pangrancana saluire sane kabuatang antuk prajuru desa.

Ra. Krama balu lanang wiadin istri tan keni paayahan minakadi tataturun sadurung okane antes mayahan, kawekas yan okane istri wiadin lanang sampun antes maayahan patut krama balu punika maayahan, mataturun cumek bulangkep antuk pianak

Ka. Krama desa ring dura desa, yogya ngaturang panaib ngadesa ngamasa-masa, panangken rahina Tilem sasih Kasanga gung arta manut pangangan beras, 5 kilogram, minakadi ngaturang dana pawangunan, ritatkalaning desa mapawangun, ngayu mwa wangunan sane kadruc antuk desa gung arta manut saka sidan.

Da. Krama unggu, yogya ngarombo saraja karya sane kapucukin antuk krama desa murwa, minakadi krama desa ngarep, yan wenten pabuat saking desa kaidikayang antuk prajuru desa.

Ta. Krama tamiu sane maagama Hindu, yogya ngaturang panaub ka desa, samasa-masa sanangken rahina Tilem sasih Kasanga gung arta manut pangangan beras 10 kilogram, minakadinngaturang dana pawangun, ngayu mwa wangunan sane kadruc antuk desa gung arta manut sakasidan.

- Sa, Krama tamiu sane tan maagama Hindu, tan sareng sapali kramaning maagama Hindu, nanging tan wenang piwal ring awig-awig, pasuaran miwah pamutus pararem desa, sane ngindikang sukreta tata pawongan lan palemahan.
- Wa, Krama desa samian yogya saturut ring daging awig-awig pasuara miwah pamutus pararem desa, ngutsahayang mangda kasidan mapikolih sakadi patitis tatujon desane kinucap ring ayun, tumus mamangguhang kajagadhitan ring praja.
- La, Sang sapasira ugi sane pacing ngadol, ngantahang, maselangang, majegang, masewayang makedihang palemahan carik, tegal paalasan miwah sane siosan sane magenah sajeroning wewidangan Desa Macang. Ugi mangda polih palugrahan saking prajuru desa, yan tan polih palugrahan yogya indike punika kaandegang.
- Ma, Yan wenten sinalih tunggal sang sapasira ugi magenah ring wewidangan Desa Macang tan makrama desa ring Desa Macang tan kalugra ngalaksanayang Panca Yadnya ring wewidangan Desa Macang, tan kalugra ngangge saluiring druen desa.
- Ga, Ritatkalane desa mapawangun, ngawangunang wawangunan sajaba kahyangan sane sampun kapuputang sajeroning paruman desa, krama desa makasami kakenenin paturunan manut pamutus pararem desa.
2. Phalapeksaning krama desa, luire:
- Ha. Krama desa samian yogya polih pasayuban wiadin pataban saking desa, saluiring wiawarania yogya kabaosan antuk prajuru desa manut tata titining wicara.
- Na. Krama desa samian sane maagaman Hindu wenang nglaksanayang yadnya sajeroning Desa Macang, manut desa kala patra, sastra agama, miwah nganutin sisan desa inucap.
- Ca. Krama desa murwa, wenang polih babagian layuban aci-aci saluiripun tuas-tuasan miwah saosan sane patut katiba ring krama desa.
- Ra. Krama desa ngarep, wenang polih babagian layuban aci-aci saluiripun, tuas-tuasan miwah saosan sane patut katiba ring krama desa ngarep.
- Ka. Nyaluk mapiteges luput ayah-ayah luire ritatkala padewasa mamakuh, ngerebin, nandur pantun, minakadi matepetin panak sungkan, polih dedaunan saking sang amawarat minakadi saosan manut panglokikan prajuru desa.

Da. Sane dados nyuksukin paayahan sang tedu maayahan yogya saking panglokikan kalih palugrahan prajuru desa.

Palet 2

Indik Prajuru Desa

Paos 8

1. Desa Macang katemong antuk prajuru desa, luire:
Ha. Kliang desa.
Na. Panyarikan.
Ca. Juru raksa.
Ra. Saking kalih diri.
2. Sane wenang kaadegang prajuru desa, luire.
Ha. Pretisentana krama desa murwa.
Na. Tandu dangga, sakadi peceng, perot cungh tan sanunggilanipun, sane katandangin kabakta saking wau embas.
Ca. Wikan mamaos nagih nyurat aksara Bali utawi latin
Ra. Mabukti tan naen malaksana corah.
3. Pidabdab ngadegang prajuru.
Ha. Sane dados adegang pinaka kliang desa, minakadi panyarikan Desa Macang, saking pratisantana kliang desa minakadi panyarikan desa, sane dados krama desa murwa, tur kacumponin antuk krama desa ngarep, manut kuna dresta.
Na. Juru raksa minakadi saking kasudi antuk kliang desa minakadi, panyarikan desa, saking krama desa murwa, tur kacumponin antuk krama desa murwa sami.

Paos 9

Swadarmaning Prajuru Desa

1. Minabdabin desa, krama desa, pacang ngupadi kajagadhitan sekala niskala, maka darsanaawig-awig desa, pasuaran desa, pamutus pararem desa, nganutin sastra agama Hindu minakadi uger-uger Negara.

2. Ngarencana saluiring utsahan desa kaungkur, minakadi ngarencana saluiring sane nyandang pacang wangunang, sane patut ayum, manut lokika desa kala patra sane mabuat, mangda kasidan polih panugrahan guru wisesa.
3. Mamaosin saluiring wiawahara sane wetu sajeroning Desa Macang niwakang tatimbang utawi pamutus bebaosan sane yogya kaputusan sajeroning Desa Pakraman yan tan kasidan kabaosin ring desa, prajuru desa mituduhang mangda ngaturang ring guru wisesa mangda kabaosan.
4. Mratiaksa, nulingayang sapasira polih prajuru desa, luire: panyarikan, juru raksa, saking desa, kliang-kliang banjar, jero mangku, kliang seka-seka sane wenten sajeroning wawengkon Desa Macang.
5. Midabdabin saluiring pamargin aci-aci ring wewidangan Desa Macang, taler nulingayang krama desa indike nglaksanyang panca yadnya.
6. Nyanggra saluiring patuduh, minakadi saraja karya saking guru wisesa, werat utawi ringan, sane yogya katiwak ring desa pakraman.
7. Pinaka dutapa sang matemuang bebaos ring sang sapasira ugi, yan painndikan punika kapineh nandang pacang marginin.
8. Wenang wewangunan, ngamanggehang minakadi ngentosin pecalang desa, seka-seka, minakadi prajuru desa saosan sane kabuatang antuk desa.
9. Wenang wewangunan seka-seka, saosan sane pacang ngarombo swadarma prajuru desa sane kabuatang.

Paos 10

Palapeksaning prajuru desa luire:

1. Ngamel, ngelangang, mretingkah tanah lan pura sane kaanggen buktin prajuru.
2. Wenang polih tuas-tuasan sane patut katiba ing prajuru desa.
3. Minakadi polih olih saosan manut pasuaran desa.
4. Wenang polih pangelan, yan usan sangkaning rahayu.

Paos 11

Prajuru desa kagentosin utawi usan, majalaran antuk:

1. Seda.
2. Mabukti sungkan rahat tur sue kantos tibanan.

3. Mapinunas sangkaning rahayu, saha polih panugrahan saking paruman desa.
4. Sangkanig bada.
5. Sangkaning makundulang.
6. Sangkaning kausanang antuk paruman desa, sangkaning wyawahara.

Palet 3

Indik sangkepan miwah paruman

Paos 12

Munguing sangkepan miwah paruman sajeroning Desa Macang. Kadi ring sor puniki:

1. Sangkepan krama desa murwa ngasasih, satunggil, Buda, Wage, magenah ring Bale Agung, menjangang sangkepan punika, prajuru desa ngawentenang parumbugan.
2. Paruman desa, kawentenang sasor ipun ngalih warsa, minakadi padgata kala manut kabuatan desa. Sane patut nedunin paruman desa, luire: prajuru desa, krama desa murwa, prajuru banjar. Prajuru pura, prajuru sekaa-sekaa, minakadi sang kabuatang antuk desa.
3. Sangkepan banjar, pamaksan pura, muah sekaa-sekaa sane wenten sajeroning desa Macang kawentenang manut awig-awig pasuarannyane soang-soang nanging ugi tan sinarengan ring sangkepan krama desa murwa, minakadi paruman Desa Macang.

Paos 13

Tata kramaning pasangkepan miwah paruman:

1. Krama desa murwa mabusana sarwa putih lan nyungklit keris rikala sangkepan krama desa murwa, sajaba paruman desa.
2. Nganggan upakara daksina, canang pangraos, canang sari, segehan, minakadi pasayan utawi cane, madaging lekesan, lontar katihan, tali tutus, tingkih matunu, kapas, minyak atakir, boreh, miik atakir.
3. Kekawitin antuk tengeran suaran kulkul sekadi ring sor puniki:
 - Ha. Menjangang sangkep kasuarayang kulkul pangenten.
 - Na. yan nenten pacang sangkep rikalaning Buda Wage, nenten wenten suaran kulkul pangenten.
 - Ca. Yan kalaning Buda Wage tan kasidan lumaksana sangkepane kasuarayang kulkule tigang klentungan.

Ra. Kalaning Buda Wage kulkul patedunan sangkep saha sayane nagingin janggine toya.

4. Penyarikan macak krama desa, yan krama desa tedun sasor kalih pah tigayan, sangkepan wiadin paruman desane kalanturang karuntutin antuk ngaturang upakara.
5. Maka manggalaning bebaosan sajeroning sangkepan miwah paruman desa, manggeh kliang desa, wiadin silih sinunggil prajuru desa saking palugrahan kliang desa.
6. Bebaosan sajeroning sangkepan miwah paruman desa, ugi ngupadi karayon jagat, minakadi ngrajegang tamurungan Sang Hyang Widhi, majalaran bawa laksana manut catur dresta, luih ipun: sastra dresta, kuna dresta, desa dresta, miwah loka dresta.
7. Yen Wenten sinalih tunggil krama, tatengahang babaos jroning sangkepan utawi paruman yogia kadamiakang. Yan nyandang baosin yogia rinaosan. Yan tan nyandang baosin, antukang ring sang ngamimitin.
8. Sane kinucap pamutus babos, wiadin pasuara ring jroning sangkepan minakadi paruman, yan briuk sapanggul antuk sang nyangkepin, yan tan sapunika asing akehan wenang turut manut panglokika. Pamutus babaos yogia kalekitayang, kalaksanayang manerag anggeran ipun.
9. Yan tan puput babaose sajroning sangkepan ngantos ping tiga sangkepan, patut ngatengahang sajeroning paruman desa, pamutus babaos sajeroning paruman desa pinaka pamutus pamekas.
10. Sangkepan, paruman punika kabaos sampun puput, yan sampun keliang desa mitegesang daging-daging sane sampun kacumpunin ring krama desa saha sasampun nimbang turak pagilih saya.

Palet 4

Indik Kulkul

Paos 14

1. Sajeroning wawengkon desa macang, wenten bebacakan kulkul, kadi ring sor puniki:
Ha. Kulkul Desa
Na. Kulkul Banjar
Ca. Kulkul Pamaksan Pura

Ra. Kukul Sekaa

2. Mungguing suaran kukul punika mangda mabina-binayan sawiji soang manut sor singgih, yan wenten suaran kukul pateh, karun wiadin sawer, mangda kapastika salah sawiji antuk sang madrue.
3. Nepek kukul manut ring brata sandi:
Dharma, Shima, Laksana, teges ipun:
Ha. Dharma: suaran kukul makacihna wiadin tatenger upacara agama wiadin yadnya.
Na. Shima : suaran kukul makacihna wiadin tatenger panyubaya.
Ca. Laksana : suaran kukul makacihna wiadin tatenger pagecunan.
4. Indik Tatepekan kukul manut pasobaya, kuna dresta minakadi pasuara.
5. Ungguan nepek kukul :
Ha. Yan nepek kukul tatenger patedunan, ugi kukul sane kadrue antuk krama sane pacang tedun, katepek antuk sang patut ngukulang.
Na. Yan nepek kukul katenger panyubaya, wenang saungguan-ungguan, asing nampek genahe, wenang katepek antuk sang riinan manggihin baya punika, minakadi : pituduh sang ngawiwenangang.
Ca. Yan nepek kukul tatenger upacara agama, Dewa Yadnya, Bhuta Yadnya, Manusa Yadnya, Pitra Yadnya, wenang kukul sane wenten ring soang-soang genah upacarane.
Ra. Yan kalaning ngalungayang Bhatara, mendak Bhatara, Bhatara turun kabeh, kalaning pasuruan desa, sami kukul sajroning desa dados suarayang, patepekan manut krama.
Ka. Yan wenten sinalih tunggal mamurug, nepek kukul tan manut krama, yogia babaosan rientuk prajuru desa, katiwakang panglokika saha pamidabda manut suara.

Palet 5

Indik Padruean Desa Pakraman Macang

Paos 15

Sane kadrue antuk Desa Macang, luire :

1. Ha. Pura Puseh
Na. Pura Bale Agung
Ca. Pura Dalem, minakadi Prajapati.
2. Pura Kahyangan Desa luire :

- Ha. Pura Batu Madeg.
 Na. Pura Melanting.
 Ca. Pura Tirta Anakan.
 Ra. Pura Patapan.
3. Palemahan marupa tanah luire:
 - Ha. Tanah karang desa
 - Na. Tanah karang pura, sane magenah ring wawidangan desa
 4. Pratima-pratima pralinggan Ida batara, ilen-ilen sejangkep ipun miwah wawalen.
 5. Gong abarung
 6. Lembaga perkreditan desa, minakadi utsahan desa saosan.
 7. Sakancan kalebutan toya, toya anakan, sane dados kaanggen beji miwah kasalud antuk krama desa, sane dados tantan ngadesa, sami kadrue, kaelingang antuk desa.

Paos 16

Pilih-olih Desa Pakraman Macang,

1. Upeti tanah pelaba pura.
2. Pilih-olih saking pamupon tanah carik, lan tegal pelaba pura.
3. Aturan-aturan, minakadi dana punia saking suka nirmala.
4. Urunan, panaub, pangenin-ngenin pakaryan krama desa.
5. Pilih-olih saking Lembaga Perkreditan Desa.
6. Panyewan tanah druen desa sane kaanggen genah madolan sakadi kios miwah sapanunggilan ipun.
7. Pilih oliv saking usaha gunakayan krama desa minakadi saosan saking patut rahayu.

Palet 6

Indik Laluputan

Paos 17

1. Luput mapiteges nenten ngeni wawijilan miwah paayah-ayahan kalaksanayang ring banjar soang-soang.
2. Krama desa Macang sane luput luire:
 - Ha. Sang aprawita, apapujaan.
 - Na. Pamangku desa.

Ca. Sekaa Gong.

Ra. Sang sapisira ugi sane kapineh antuk desa patut nyandang polih aluputan manut pasuara.

3. Pretisentanana I Gusti Ngurah Mambal sane kari manggeh kawangsane luput paayah-ayah pamaksan pura.

Palet 7

Dadosan Patedunan

Paos 18

Dadosan patedunan, sangkepan tedun mekarya miwah sane saosan, nganutang sukreta soang-soang, luire:

1. Yan prajuru desa pakraman madrue patedunane yogya nganggen sukretan desa, sane kagaduh antuk desa, dadosan ngeranjing ka desa.
2. Yan krama desa murwa madrue patedunane yogya nganggen uger sukretan krama desa murwa, dadosan ngeranjing ka krama desa murwa.
3. Yan babanjaran madrue patedunane yogya nganggen sukretan banjar soang-sonag sane sampun kagaduh antuk banjar punika, dadosane ngranjing kabanjar,
4. Yen subak madrue patedunane, yogya nganggen uger sukretan subak sane sampun ngegaduh antuk subak soang-soang, dadosane ngranjing kasubak,
5. Yen sekaa-sekaa madrue patedunane, yogya ngangge uger sekaa soang-soang, dadosane ngranjing ka sekaa.
6. Yan wenten krama sinalih tunggal tan tinut ring tatepasan miwah dadosan punika, wenang pabaose ngatengahang ka desa, prajuru desa wenang mamaosin.
7. Agung alit dadosane sane katerapang ring wawidangan desa macang luire: ring desa, ring banjar-banjar, ring subak-subak, minakadi sekaa-sekaa saosan mungguh sajeroning pasuarania soang soang saha maciaciren palugaan prajuru desa pakraman macang.

Palet 8

Indik Baya

Paos 19

1. Sane kinucap panca baya, luiripun: jiwa baya, agni baya, toya baya, arta baya. Bayu baya.
2. Saluiring baya wenang geherang antuk suaran ngulkul.

3. Sang sapisira ugi krama desa sane manggihin, wiadin uning ring panangkaning baya, rikang katiben baya, wenang ngegerang nepek ngulkul manut indik ngakulkulan baya, raris mamiakang ring we desa.
4. Rikala wenten suaran ngulkul bulus tatenger baya, krama desa patut yatna, sayaga, saha sregep ngamong prabot wiadin gegawan soang-soang.
5. Yan sampun tatas ring baya punika krama desa patut matetulung nambakin, wiadin ngamesehin baya punika manut ungguan, kalih manut patuduh sang yogya ngawiwenangang.
6. Sang sapisira ugi tan ngawasama jajabur rikalaning desa, krama desa katiben baya, yan wenten sinalih tunggal ngaciren mamuruk, yogya katengahang kadesa, wiadin katur ring sang amawa bumi mangda kabaosan.
7. Yen pinganan baya punika sampun ngapineh nahnah, tan pacang nyengkalen wenang kacihnayang antuk suaran kulkul banban atuludan, wiadin pasiar saking sang ngawiwenangang.

Palet 9

Indik Rarampagan

Paos 20

1. Sane wenang pacang rampag duk sane pacang anggen ngarebin bale agung.
2. Taru-taru sane kabuatang pacang kaanggen lan wewangunan ring desa kasawenin antuk desa mungguing pangargan ipun ngaka taur kadi patute.

Palet 10

Indik Panyanggran Desa miwah Banjar

Paos 21

1. Saraja karyan desa kasanggra antuk krama desa murwa, minakadi krama desa marep katunadikayang antuk prajuru desa.
2. Saraja nyaryan banjar kasanggra antuk krama banjar soang-soang, kaunadikayang antuk prajuru banjar.
3. Saluiring karya pitra yadnya patut kasanggra antuk banjar.

Caturta Sargah
Sukerta Tata Palemahan
Palet 1
Indik Tegal, Bangket, lan Karang
Paos 22

1. Palemahan Desa Macang, mauger antuk tri mandala, luire:
 - Ha. Utama mandala, palemahan sane kaanggen ngarang pura, wiadin parahyangan.
 - Na. Madya mandala: palemahan sane kaanggen ngarang pomahan, genah wawangunan, sekadi: banjar, sekolah, kantor, klinik, miwah sane saosan.
 - Ca. Nista Mandala: palemahan sane kaanggen setra, margi, rurung, papunduk, telajakan karang, miwah sane saosan.
2. Sekancan palemahan sane wenten ring wewengkon desa macang patut madrue papaledan wiadin waates sane pasti.
3. Sahanan palemahan punika ugi mangda madrue margi, rurung papunduk utawi lisig sane dados kaentasin,
4. yan wenten pakarangan pura, pomahan, tegal, miwah palemahan saosan kabebengtan mdrue margi, rurung, miwah papunduk, sang madrue patut ngatengahang babaose kadesa. Prajuru desa yogya negdeg, ngutsahayang mangda polih margi malarapan sangkaning sami suka. Yan patut matumbas, manut pangargan tanah sane kamanggehang antuk sang amawarat, sami kataur antuk sang mamuatang.
5. Yan desa pacang ngalinggahang margi, minakadi makarya margi, saking sampun ingkup pasuaran desa, yan wenten tegal bangket, abian miwah palemahan sane kalintangin, yan lintangan ring ameter lintang ipun patut kataur antuk desa manut pararem. Tanem tuwuh miwah wawangunan polih prabea manut panglokika kala punika.
6. Sahananing karang pomahan ugi mangda masengker. Pidabdab nyengker, magaleng kadulu. Panyengker sane sisi kangin miwah kaler, patut kakaryanin antuk sang ngenahin karang punika sajaba karang ngele wiadin lingkehin rurung palemahan suung.
7. Sang sapisira ugi ngenahin karang tegehan, patut naku, tegehe patut asukat natah dangsah sane tebenan, wenang nyusunin tembok.
8. Telajakan karang patut kapiara antuk sang ngenahin karang punika soang-soang, mangda mapikenoh tur kanten asri.

9. Yan wenten sinalih tunggal nyadya nyaleksek wiadin ngaleklek babaledan saluiring babaledan wiadin wawatesan, luire: babaledan wiadin wates pura, karang pomahan, tegal, setra, jlinjing, margi, rurung, papunduk miwah sane saosan. Yogya katiwakan danda manut werat ringan kaiwangane, saha mahayusane kasleksek wiadin kaleklek malih mrayascita saka buatan sane nyandang katiban panyangaskara, indik negdeg wawatesan utawi babaledan manut dresta kuna.
10. Yan ana sinalih tunggil ngaletihin, ngarucakin, ngarobedin, ngararabin palemahan liwa ring pomahan kadruen nyane, luire: ngutang luu, bangkaan miwah saluir ipun, nyorongang babanyon, yogya katiwakan danda gung arta manut pasuara, tur mahayusane kaletihan, karucakan, karobedan, raraba ri ajeng sami mantuk ka desa.
11. Yan wenten anak ngenahin palemahan sajroning wawengkon desa macang tan tinut makrama desa nganutin awig-awig miwah pasuara desa, tan kalugra nganggen saluiring paduean desa, tan kalugra nglaksanayang panca yadnya sajroning desa macang. Yan tekaning kapatian dados saubang utawi pendem ring setra teben, tan polih panyanggrahan banjar utawi panyanggrahan desa.
12. Yan wenten anak tan magama hindu ngenahin palemahan jroning desa pakraman macang patut nganutin pasuaran Desa Macang.
13. Yan wenten krama desa pacang ngalintangang toya, babanyon saking pakarangannyane ngalintangin palemahan saosan, urung-urunge patut matanem, dalem tetanemanne sasor ipun limang langkat utawi ameter.
14. Sang sapisira ugi krama Desa Macang, yan pacang ngadol, ngantahang, maselangang, majegang, makedihang palemahan sajroning wawidangan Desa Macang, ugi mangda polih palugrahan prajuru Desa Macang, yan wenten mamurug indike punika patut kawicarayang.

Palet 2

Indik Kekayonan

Paos 23

1. Ngawit nandur kakayonan tanem tuwuh, patut adepa agung ngajroang saking wates, prade jantos ngaliwat wates carang ipun wenang kasepat gantungin.
2. Tan kalugra nekteb, ngarebah, wit-witan saluir ipun, ring pategalan, abing, tangkid, miwah genahe saosan, sane kakeker antuk desa, yan wenten sinalih tunggal mamurug katiwakan danda manut panglokika, manut pasuara, tur taru sane wang mangda kantun manggeh kadi kuna.

3. Saluiring wit-witan sane sampun kacirenan wiadin kasawenin antuk desa, pacang mangge pawangun ring desa, prade punika karebah antuk sang madrue, yogia sang madue katiwakin danda, manut lokika, manut pasuara, taru wiadin wt-witan sane karebah mantuk ka desa, wiadin ngetang pangarga.
4. Yan wenten wit-witan wiadin kakayonan ngungkulin palemahan anak saosan, sane ngawinang tiyeb, tampyas, ngarobedin, asing nuggulang wenang ngatengahang ka desa, prajuru desa mari tetes saha mituduhang sang madrue mangda ngrancap, nekteb wiadin ngarebah. Kantos ping tiga pituduh desane tan ngalingu, wenang katiwakan danda sang anikel tuduh gung arta manut pasuara. Kakayonan punika prasida karebah antuk desa picundangan.
5. Sang keni pamidanda panyangaskara saha prabeya manut maputus pararem desa marep ring wewangun sang karubuhin luire:
 - ha. Sang druenang wit sinanggeh payanin, prade pungkak ngarubuhin wewangunan krama siosan.
 - Na. Sang notor, munggul utawi ngarebah taru sane ngarubuhin wewangunan krama siosan.
6. Tanem tuwuh miwah tetanduran saosan sajroning karang paumahan, tan kalugra tegeh ipun lintangan ring jan palit solas wiadin limang meter, bungkil ipun adepa agung wiadin kalih meter tengah saking panyengkere ngjeroang. Yan mamurug wenten raris ngatengahang ka desa, yogia sang mamurug katiwakan danda gung arta manut pasuara, saha ngarebahin inucap ring ajeng, saha mrayascita sane nyandang keni panyangaskara.
7. Kekayonan jeroning karang paumahan, ugi mangda piara mangda tan kaletihin, ngarobedin, mamayen karang saosan saking akah kantos daun ipun. Yan wenten mamurug, tan ulinga ring kakayonan due, wenten katengahang ka desa, prajuru desa yogia maritetes, saha nepasin pasuaran desa.
8. Yan wenten taru mentik kantos ageng ring babaledan, wates, saluiring babaledan muang wates, wenten ngatengahang ka desa, patut taru punika karebah, raris pinaratiga apah tiga yan mantuk ka desa, sang madrue babaledan apah tiga yan soangsoang.
9. Yan wenten sinalih tunggal nundungin tanem tuwuh, kakayonan, sane kasuatah pacang mamayen, wenang kabaosang ring sang madrue. Yan akas sang madrue yogia katengahang ka desa. Prajuru desa negdeg tanem tuwuh wiadin kakayonan punika, yan manut panglokikan prajuru desa yogia tan dungin, taler akas sang madrue patut

spat gantungin. Yan jati kadi panyuatahe, yogia sajroning tigang dina, karebah picundangan. Sang madrue katiwakan danda gung arta manut pasuara dosane anikel tuduh. Yan tan yukti kadi panyuatahe sang ngatengahang katiwakan danda gung arta manut pasuara, dosane angada kakannora, tanem tuwuh wiadin kakayon punika tan karebah.

10. Yan wenten sinalih tunggal nyadia nandur pijer, turus, saluiring tanem tuwuh wiadin kakayonan sane pacang dados ageng, nesek ring babaledan, ring wates, papunduk, ugi mangda supeksa ring prajuru desa, kalih ring panyanding soang karebahmantuk ka desa, sasampun polih palugrahan saking sang amawarat.
11. Yan wenten krama nandur pijer minakadi tetanduran sekadi poh, cengkeh, juuk, salak, miwah sane saosan, sane tuwuh ipun panjang ring tegal pasakapan, ugi mangda makarya pasobaya ring sang madrue tegal inucap. Yan durung pinganan mawoh tetanduran punika, durung naen ngalapin woh ipun pinih sor limang pelabuh, sajaba sangkaning kaiwangan panyakap, raris kajabutan, yogia sang madrue tegal naur panjala sawit-sawit, gung arta manut pasuara.
12. Sang sapisira ugi nyakap tegal, tan kawasa ngarebah tetanduran sane dados anggen lakar wewangunan yan tan polih lugra saking sang madrue tegal punika.
13. Yan wenten wit-witan sajroning tegalan rebah antuk kapancabaya tan dados kajaratin antuk sang sapisira ugi, yan wenten mamurug keni mamidanda manut panglokika.
14. Tan dados rerehan saluire ring tegal tani drue, tegal sesakapan drue yan tan kapisukayang, yan wenten mamurug, wenten raris ngatengahang ka desa, keni mamidanda manut pnglokika.

Palet 3

Indik Wewangunan

Paos 24

1. Sang sapisira ugi krama desa sawewengkon desa macang, yan pacang ngawangun panyengker karang paumahan, patut masupeksa ring panyandinge. Yan tan radin yogia nunas degdegan ring prajuru desa, prajuru desa negneg sadua ajeng sang mawiwara.
2. Wewangunan ring palemahan sajroning tigang rahina saking pamuput bebaose.

3. Yan tan masanggih panguluning karang. Kabaos akakubun. Tan yogia genah ngraksa sawa. Yan wenten mamurug, yogia katiwakan pamidanda mangda mrayascita palemahan punika.
4. Yan wenten sinalih tunggal sang sapasira ugi pacang ngawangun -wangun genah ngalaksanayang upacara agama luire: pura, masjid, gereja, wihara, miwah sane saosan, ugi mangda wenten lekita palugrahan prajuru desa, kalih lekita palugrahan guru wisesa. Yan wenten mamurug, kadi kinucap ring ajeng, kabaos tan sida karya, tan wenang anggen, tur wewangunan punika yogia kawangdeang.
5. Wewangunan jeroning paumahan, ugi nganutin tri mandala: utama mandala, sanggar panguluning karang, madya mandala, pagenahan mapumahan, nista mandala, ngaran lebu, jabayan.
6. Tan wenang ngungkulung capcapan wewangunan kajroning karang pomahan saosan tani due. Yan wenten mamurug, wenten ngatengahang ka desa, yogia prajuru desa negneg, saha nyipat gantungin. Yan jati lintang sajroning slae rahina saking puput bebaose mangda sampun kapastika.
7. Tan wenang nganggen tembok umah wiadin tembok panyengker tani druesawang. Yan tan kalugra tan kapisukayang, prade taler kapurug, yogia sang mamurug katiwakan danda gung arta manut pasuara, tur ngamademang tetanduranne.
8. Sang sapasira ugi pacang mapawangun nepi ring margi agung, nepi ring rurung desa yogia mangda wenten lekita palugrahan saking prajuru desa, wiadin lekita palugrahan sang amangwarat. Yan ane polih lekita palugrahan, padgata kala wewangunan punika dados katundungan tan ngetang prabeyan katundungan.
9. Sang sapasira ugi krama desa ngawengku karang paumahan, yogia urati miara kaasrian lebu pakarangannia, rurung wentasan pinih sor asukat karangnia ngalajur.
10. Sang sapasira ugi pacang ngawangun hotel miwah sapanunggilan ipun ring wawidangan Desa Macang, patut mawaneng pinih sor, 150, meter saking kahyangan desa sane wenten sajroning desa. Saha ugi mangda wenten lekita pasobaya kalih palugrahan saking prajuru desa kalih sang amawarat.
11. Sang sapasira ugi pacang makarya wewangunan ring wewidangan desa macang, yan kantos pacang ngamademang tetanduran tanem tuwuh sane kapineh ngalikadin mangda kawentenang rarembug ring sang madrue minakadi naur panebas ipun.
12. Sang sapasira ugi pacang mapawangun karang paumahan ring wewidangan desa macang patut mawaneng pinih sor, 100 meter saking pura kahyangan tiga minakadi pura kahyangan desa.

Palet 4
Indik Wewalungan
Paos 25

1. Sane kinucap walungan, sakancanin buron suku pat sane nyadia kapiara, sakadi: bawi, kebo, misa, jaran, miwah sapanunggilan ipun, taler watek makampihan wecak tegul, bangket palemahan suwung, sane sampun mesanggah pawon, palemahan punika prasida kabawos karang paumahan, duaning sampun katiwakan pangukuran karang. Awanan patut madue rurung betel kamargina agung, sukat dados pacang ngalintangan papaga, duaning tan kapatut ngalintang sawa ring carik, tegal, yan wenten mamurug, yogia prajuru desa niwakang tatepasan mangda sang mamurug mrayascita palemahan inucap sane kalintangin.
2. Sang sapa sira ugi krama desa sane miara wewalungan suku pat, sajaba asu, tan wenang ngalumbar. Sane patut patlusuk mangda matlusuk, sane tan patut matlusuk, mangda mategul bawong. Sane patut pagelogor, makandang, ugi mangda magelogor wiadin kandang. Mangda tan karucakin, ngaletihin palemahan tani duwe, miwah memayen krama desa jana pada. Yan asu mangda mabelat luire makalung bawong, makacihna wenten sane miara.
3. Sang sapa sira ugi krama desa, miara watek suku kalih, watek makampid, yatnain ugi mangda tan banget ngarucakin, ngaletihin, paumahan, tetanduran druwen anak sawos.
4. Tan wenang ngangonang, negulang, ingon-ingon ubuh-ubuhan, ring palemahan tan druwe, minakadi sakapan druwe yan tan kapisukayang. Sang madruwe palemahan, prajuru desa, lang-lang desa, keliang-keliang asing mamanggihin, wenang nyambat sara sang madue wewalungan ike. Yan akas sang kasambat sara, wewalungan ike wenang taban, prajuru desa yogia niwakang pamidanda manut lokika, gung arta manut pasuara.
5. Tan wenang ngangonang, negulang ubuh-ubuhan, ring palemahan karang pura, kahyangan saluir ipun, minakadi setra, rurung, papunduk, margi, telajakan, palemahan sane pingit, karang suung, miwah sabacakan ipun. Yan wenten mamurug, prajuru desa, lang-lang desa, kelian-kelian banjar, prajuru desa sinalih tunggal, asing mamanggihin wenang nyambat sara, saha naban wewalungan ika, wenang kasambat sara antuk sang madruwe. Yan akas tur mamurug sang kasambat sara, yogia katengahang ka desa, kabowosang antuk prajuru desa.

6. Yen godel banteng, godel kebo, godel misa, durung matlusuk, godel jaran, kambing , miwah sebacakan ipun, durung antes mategul, yogia sedekang ring sang madrue.
7. Yan bebek, angsa, dolong, miwah sapanunggilan ipun, ngarucakin tetanduran, taler wenang taban. Indike naban, mangda masaksi, saha kasupeksayang ke desa pramangkin, prajuru desa yogia mawosin niwakang mamidanda manut panglokika.
8. Yan wenten wewalungan ngeleb, mamegat, ngeranjingin palemahan pura, kahyangan, setra, karang paumahan miwah sane saosan, lokikanan juga. Yan tan nyadia kalebang tan yogiataban.
9. Sang sapisira ugi ngarereh ulam ring tukade, ring telabahe, ring jelingjinge miwah saungguning ulam sajeroning pakraman macang tan kalugra tan wenang nganggen tuba saluring tuba, setrum, portas, miwah sane saosan. Tan wenang nguukang empelan miwah temuku. Yan wenten mamurug wenang katengahang ka desa pramngkin, kabaosan antuk prajuru desa saha katiwakang danda gungarta manut pasuaran desa kalih manut panglokika.
10. Sang sapisira ugi tan kalugra medil, ngejuk paksi sajeroning desa macang, yan wenten mamurug wenang katengahang ka desa pramangkin, kabaosan antuk prajuru desa saha katiwakan danda manut panglokika, kalih pasuaran desa. Sekancan dedandan, dedosan sane munggah ka tengahang ka desa, katiwakan danda gungarta manut pasuara, saha mahayu yan wenten karusakan, tur mrayascita palemahan ike sane nyandang prayascita, manut panglokika. Yen wenten maubuh ubuhan sajeroning karang paumahan, ugi telajakan mratiaksayang kandang ipun mangda tan ngawetuang baya, panyungan. Taler mangda apik, guriten siksa, mangda tan kantos ngaletihin, ngarobetin nyerobohin karang paumahan wiadinpalemahan panyandinge. Yan wenten mamurug, tan priksaring ingon-ingon miwah kandang ipun wenang panyandinge nyambat sara, wenang katehang ka desa, prajuru desa nepasin. Wenang katiwakan danda manut panglokika kalih pasuaran desa.
11. Sang sapisira ugi krama desa ngwangunang kandang wewalungan, buwat adol atuku, kandang ayam, itik, miwah sapanunggilan ipun, buwat naluhang miwah adol tuku, dagingan satus ukud. Yan kandang wawalungan suku pat, luire kandang banteng dagingan petang ukud, kandang bawi ,kambing dagingan adasa ukud, soang –soang, ike wenang jeroning karang paumahan. Yan lintangan ring punika daging kandange tan wenang wangunang jeroning karang paumahan , yogia kawangunang ring palemahan sane mawaneng sator ipun satus depa saking palemahan karang paumahan, sekolah, kantor, pura kahyangan, minakadi genah sane kaketer wiadin

kapingitang antuk desa macang. Tur mangda madrue lekita panglugrahan saking sang amata bumi.

12. Yan wenten wewalungan ngrucakin, ngarug tetanduran, wenang taban. Sang madrue tetanduran ngatengahang ka desa sane nyadia kapiara sakadi ayam, itik, angsa, dolong, miwah bebacakan ipun.

**Panca Masargah
Sukerta Tata Agama**

Palet 1

Indik DewaYadnya Kaping 1 Indik Kahyangan

Paos 26

1. Pura kahyangan tiga luire pura puseh, pura baleagung, pura dalem miwah prajapati, pangaci-aci minakadi papayon kaempon antuk krama desa murwa manut pasuara minakadi kuna dresta.
2. Pura kahyangan desa luire : pura batumadeg, pura malanting, pura tirta anakan, miwah pura patoyan, pangaci-aci minakadi papayon kaempon antuk krama desa murwa manut pasuara minakadi kuna dresta.
3. Pura dewa gede tenganan, pura dewa bagus badung, pura dewa ayu mas muter, pura dewa ayu mas maketel, minakadi pura panyatur pangaci-aci kali papayon kaempon antuk soang-soang pamaksan pura manut pasuara minakadi kuna dresta.
4. Pura banjar, mangaci-aci kalih pepaon kaemponin antuk banjar soang- soang manut kuna dresta minakadi masuaran banjar.
5. Pura bedugul mangaci-aci kalih papawon kaemponin antuk sekaa subak.
6. Pura beji dedari ring banjar dukuh, miwah pura beji kelod ring banjar sirang mangaci-aci kalih pepawon kaemponin antuk banjar soang- soang.
7. Yen wenten karecehan, wicara, sajeroning banjar, pangempon pura subak, sinalih tunggal, wenang katengahan ke desa, prajuru desa memawosin, nyahcahang, nepasin wicarane mangda kasidan mawali landuh jati mula.
8. Tan wenang kuwah nguwuhin wawilangan palinggih batara, sane wenten ring pura kahyangan soang-soang-soang pramangkin. Kabaosan antuk prajuru desa, saha katiwakang danda manut lokika pasuaran desa.

Kaping 2
Indik Pangaci-aci
Paos 27

1. Indik pangaci-aci ring pura kahyangan sane wenten sajroning wawengkon Desa Pakraman Macang, kaamongin antuk krama desa, manut emponan wiadin pamaksan soang-soang, soang-soang pura madrue gagaduhan, pinaka uger pangaci-aci, miwah babanten.
2. Ngaturang piuning ring pura sane pacang ngaturang aci mitung rahinang piodalan ring pura kahyangan pinika.
3. Sane yogia muput pangaci-aci ring pura kahyangan sajroning Desa Macang manut kawentenan upacakra luire:
ha. Yan upakara tan masuci pabangkit yogia kapuput antuk pamangku ring pura inucap.
Na. Yan upakara kantos masuci pabangkit yogia kapuput antuk ida sang maangga sulinggih sane katuur antuk krama desa.
4. Yan wenten sinalih tunggal pura madrue mangku, utawi pamangkune kapialang, dados nuur sinalih tunggal mangku kahyangan desa, prade taler tan mrasidayang patut nuur ida sang maangga sulinggih.
5. Sane kabaos pamangku desa wantah pamangku kahyangan tiga lan pamangku kahyangan desa.
6. Rikala desa ngawangun karya ageng muang karya –karya siosan ring pura puseh, pura baleagung, pura dalem, minakadi ring pura kahyangan desa, desa dados nyarad pamangku kahyangan sane wenten ring wawengkon Desa Pakraman Macang pacang ngarombo pamangku desa.

Pawos 28

1. Indik pangaci-aci pura paibon, pamerajan, dadia, muang pura-pura sajaba emponan desa sane wenten sajroning Desa Pakraman Macang, punika kaamongin antuk krama pengempon pura inucap, manut sima drestania soang-soang, tan singsal ring sastra agama hindu.
2. Yan wenten sinalih tunggal pura beji tan kaaci acinin toyan ipun tan yogya anggen sadana karya suci.

Pawos 29

Aci-aci, piodalan, pangusaban, minakadi pasegeh ring kahyangan luire:

1. Pura Dalem miwah Prajapati rikala rahina tilem sasih kapitu.
2. Pura Puseh rikala purnama sasih kawulu, limolas rahina saking aci ring Pura Dalem.
3. Pura Bale Agung rikala rahina purnama sasih kasa.
4. Pura Dewa Gede Tenganan, Pura Dewa Bagus Badung, Pura Dewa Ayumas Muter, Pura Dewa Ayumas Maketel, miwah pura panyatur rikala rahina purnama sasih kawulu sinarengan ring aci pura puseh.
5. Pura Batu Madeg rikala rahina Budha Kliwon Pahang nyanang sapisan, ageng sapisan sane awarsa, saha kadulurin tabuh rah.
6. Pura Melanting rikala purnama sasih kelima sinarengan sareng ring Pura Tirtwa anakan kalih ring Pura Beji soang-soang.
7. Pura banjar rikala rahina Saniscara Kliwon wuku Kuningan.
8. Ritatkala kemargiang aci ageng, menjangang sedurung Ida Betara katuran piodalan, Ida kairing masucian ka Pura Tirta Anakan.
9. Rikala Ida Betara jagi masineb Ida Betara Kabeh katuran pamendak ring jaba pura, wawu kairing ka pasimpunan Ida soang-soang

10. Ring Pura Kahyangan Tiga miwah Kahyangan Desa kamargiang usaba luire:

Ha. Usaba ngamumu rikala tilem sasih kepitu magenah ring Pura Dalem. Eedan upacara luire:

1. Tigang rahina sadurung aci kamargiang ngenahang pangejukan memedi ring soang-soang palinggih pomahan
2. Menjangang aci pangejukan memedi punika kaambil raris kagenahang ring duur jalikane ngalantur krama desa ngamargiang pajagran ring catuspata.
3. Ring rahina acine saking semeng kamargiang upacara mapepada wewalungan sane jaga kalanggen caru sausan upakara kakaryanin kamargiang upacara.
4. Upacara Dewa Yadnya ngaturang piodalan ring Ida Betara Dalem kalih Ida Betara Prajapati.
5. Upacara Bhuta Yadnya ngaturang pecaruan Panca Dhurga ring natar Pura Dalem.
6. Upacara Pitra Yadnya ngaturang sodaan ring para Pitra magenah ring jabaan pura.
7. Ring pomahan soang-soang kamargiang pemsman memedi ring pamedale utawi ring lebuhe, abun nyane kareka kaaturin rayunan miwah canang sari, kadulurin sesapan: "Di di memedi budal kedulu ngalih be balung, sesapan punika kantos ping tiga ngraris nyuarayang kentongan maplekoncongan sawengi".

8. Benjangne kamargiang panyepian adat krama desane ten dados ke dura desa, sapunika taler krama desa miwah krama saking dura desa ten dados ke Desa Macang, tan dados nyuun utawi negen saking jam, nem, kantos jam roras.

Na. Usaba Manggung rikala rahina tilem sasih kesanga magenah ring catuspata ngalimang warsa apisan eedan upakara:

1. Upacara kamargiang ring catuspata antuk pacaruan balik sumpah madia, nganggen ayam manca, kadulurin antuk banteng kelod, asu bang bungkem kelod kauh, bawi butuhan kaler, angsa kangin, bebek mabulu sikep ring tengah.

2. Ida Bathara Kabeh tedun manggung ring catuspata nigang rahina sadurung tilem kesanga.

3. Benjangne, kalih rahina saking tilem kesanga Ida Bathara kairing melasti ke segara.

4. Ring tilem kesangan kamargiang:

Ha. Mapepada wewalungan sane kaanggen caru.

Na. ngaryanin tetandingan eteh-ete caru.

Ca. benjangne ngamargiang Catur Berata Panyepian.

Ra. Ring ngembak geni ngelantur Ida masineb.

Ca. Usaba Gantung utawi Usaba Dangsil rikala purnama sasih kelima, ngelimang warsa, utawi pitung warsa apisan, utawi sia warsa apisan pinih sue solas warsa apisan manut kawentenan tumpang dangsil. Sarana utawi piranti usaba luire:

1. Dangsil:

Ha. Dangsil desa timpang solas kakalih

Na. Dangsil Pamaksan Pura Dewa Gede Tenganan tumpang sia

Ca. Dangsil Pamaksan Pura Dewa Gede Bagus Badung tumpang pitu

Ra. Dangsil Pamaksan Pura Dewa Ayumas Muter tumpang pitu.

Ka. Dangsil Pamaksan Pura Dewa Ayu Mas Maketel tumpang lima.

2. Gantung-gantungan, kasegsegan lan jaung-jaung. Eedan upacara:

Ha. Ngawit purnama kelima kamargiang aturan dangsil katur ring Pura Puseh miwah Pura Bale Agung, minakadi ring Pura Dewa Gede Tenganan, Pura Dewa Gede Bagus Badung, ring Pura Dewa Ayu Mas Muter, Pura Dewa Ayu Mas Maketel, taler ngaturang panyacak ring pura-pura siosan kadulurin rejang ring puseh, raris rejange megayot ring jantrane ring Pura Bale Agung.

Na. Kalih rahina saking usaba gantunge ring Puseh, meprani ring banjar nyoang-nyoang.

Ca. Kalih rahina saking meprani ring banjar Ida Bathara kairing melasti ke segara ring mewaline simpang ring pura pamaksan Macang Desa Pakraman Pasedahan, raris mewali Bathara kalinggihang ring Pura Batu Madeg.

Ra. Kalih rahina saking melasti katuran pangebek, Bathara nyejer pitung rahina.

Paos 30

1. Luring bebanten minakadi eed upacara, manut gegaduhan dresta kuna soang-soang pura.
2. Pedagingan pacang aci-aci:
Ha. Upon-upon tanah palabha pura.
Na. aturan, minakadi dana punia sangkaning suka nirmala.
Ca. wawijilan krama desa.
Ra. Pioli olah pagunayan krama desa.
3. Pasegeh tunggil kajeng kliwon purnama tilem kesanggra antuk pemangku soang-soang pura.
4. Yan wenten pialang tan sida ngaturang pangaci-aci kadi patute, yogya prajuru desa miwah pamangku ngaturang piuning ring Ida Betara. Masadana bebanten pedatengan, pecanangan, makacihna tan pegat aci-acine.
5. Yan rikala mamahayu, ngayum palinggih ring Pura Kahyangan, pinganan tan puput kala dina piodalan, pangacine wenang rangkadang, nanging pedatengan, pecanangan, tan dados pegatang. Ring wus puput masasapuh saluire, malih mewali kadi kuna.

Kaping 3

Indik Pemangku

Pawos 31

1. Ring soang-soang Pura Kahyangan patut ngadegang pemangku.
2. Pidabdab ngadegang pemangku sinalih tunggil:
Ha. Ngambil saking saserodan sentananiadin katurunan kapurusa.
Na. Saking nyanjan utawi nuur, sesampun kantos ping tiga.
Ca. sangkaning kajujuh saha kabriukin antuk krama desa.
3. Sane tan wenang kaadegang dados pemangku luire:
Ha. Cedangge luire: peceng, perot, cungh lan sapanunggilin ipun.
Na. Mabukti sungkat rat.

Ca. Mabukti naen ngarugasasana minakadi melaksana corah.

4. Sang sapa sira ugi pinaka janbanggul, pemangku ring Pura Kahyangan Tiga miwah Pura Kahyangan Desa ring Desa Macang mangda pageh ngamel kalih ngelaksanayang sesanan pemangku.
5. Sang sapa sira ugi krama desa sangkaning saserodan, sangkaning kasenengan antuk Betara polih pamutus ring nyanjan, minakadi kajujuh kabriukin antuk krama desa, pacang kaanggen pemangku, yan kari alaki rabi yogya lanang istri mawinten.
6. Sang kasudi pacang kaanggen pemangku patut mawinten ring pura genahe dados pemangku, mungguing prabia kasandangin antuk pamaksan pura soang-soang, yan pemangku desa kesandangin antuk krama desa.
7. Pemangku patut madrue amongan pura soang-soang, yan tan madrue amongan pura, prasida tan kalugra ngantebang bebanten ring pura-pura saluire.
8. Sinalih tunggal pemangku kahyangan tiga miwah kahyangan desa yan katekan pati yogya tiniwakaken. Patut polih patulung prabia atitiwa, saking desa, yan pemangku saosan saking krama pura soang-soang, agung alit satulunge nganutin pamutus bebaos sajroning pararem kala punika.
9. yan pemangku wus tiniwaken, patut kakryanang pangelad utawi sengaukan, wiadin papegatan antuk krama pura inucap sepuputa. Punika yan pemangkune kari rajeg ngamong swadarmaning pemangku kantos anjaka.
10. Piolih-olih pemangku mungguh sajroning gegaduhan pasuaran desa, pura minakadi pasuaran soang-soang, taler nganutin dresta kuna.
11. Sadarmaning pemangku luire:
 - Ha. Midabdabin upacara pujawali utawi piodalan miwah pangusaban ring pura soang-soang sadurung upacara mamargi.
 - Na. ngantebang bebanten ring pura soang-soang manut wawenangan pemangku.
12. Pemangku kagentosin mejalaran antuk:
 - Ha. Mapinunas mararian, saking patut pinunase, nanging tan kari ngelaksanayang dharma pemangku. Kawekas kalaning seda tan polih prabia atitiwa.
 - Na. Saking patut pinunase, majalaran antuk lingsir, sampun mampuh, sungkan rahat tan kengin waras, kajadayang antuk krama pura, wiadin desa. Kawekas ngalaning seda patut polih prabia patitiwan.
 - Ca. Sangkaning kausanang, majalaran antuk laksana mamurug sasanan pamangku. Kawekas kalaning seda tan polih patulung prabia atitiwa.

Kaping 4

Indik Sukertan Pura Kahyangan

Paos 32

1. Rikalaning maturan, among pamangku ring Kahyangan punika dados mungguh tedun ring palinggih-palinggih pura Kahyangan inucap. Minakadi sang sampun polih lugra saking pamangku pura minakadi lugraha prajuru desa. Yan wenten mamurug katiwakang danda mrayascita palinggih punika.
2. Pamangku sane patut ngantebang bebanten ring pura sinalih tunggal wantah pamangku sane kadrucean pura punika. Yan wenten pamangku ring pura punika utawi kapialang dados nyarad pemangku saosan sajeroning desa macang saking palugrahan prajuru desa.
3. Tan kalugra mamisuh, mabaos patikacuh, nguman-uman ring sajeroning kahyangan wiadin pura, yan wenten macihna mabukti mamurug keni denda tur mrayascita pura manut pamutus para perarem desa.
4. Tan kalugra masumpah, macorad, sajeroning pura kahyangan sinalih tunggal, sejaba sangkaning wicaran pura inucap taler saking pabuat krama pamaksan pura, utawi pabuat krama desa sane ngempon pura punika.
5. Tan kalugra wakcaphala, ascacephala, padacaphala, miwah sapanunggilan ipun sajeroning pura kahyangan. Yan macihna minakadi mabukti wenten mamurug, wenten raris ngatengahang ka desa yogia tiniwakan danda pamarisuda kahyangan.
6. Tan kalugra malaksana ngantos ngawetuang biota ring pura kahyangan. Yan wenten mamurug, sang kapineh sampun namawirang kantos mayuadi ring pura, yogia tiniwakan danda agung arta manut pamutus para perarem desa saha marisuda kahyangan punika.
7. Sang sapa sira ugi kacuntakan, saluiring cuntaka, yan during mabersih, tan kalugra ngranjing ka pura kahyangan. Yan katenger tur mabukti mamurug, yogia tiniwakan danda marisuda kahyangan punika.
8. Sedahan engengan miwah sapanunggil ipun tan kalugra masehe ring pura kahyangan sinalih tunggal, sejaba nyanjan pemangku. Yan wenten mamurug sang ngaturin yogia danda agung arta manut pasuara saha ngawangdeang masehe tur marayascita pura.
9. Tan kalugra ngawenteka klecan jajuden sajeroning pura kahyangan. Yan wenten mamurug sang ngelaksanayang katur ring sang amawarat, tur kaklecan jajuden punika kawangdeang.

10. Tan kalugra malaksana luiring sane kasinanggeh tan suci kajroning suker utawi panyengker pura kahyangan. Yan wenten mamurug yogia sang mamurug marisuda pura ika.
11. Sang sapa sira ugi rikalaning makemit ring pura kahyangan yan merem tan kalugra madukan lanang istri, sejabana anak sane kapineh kari alit, during rumaja putra. Yan mamurug keni denda manut pamutus perarem desa, tur mrayascita pura punika.
12. Pemaksan soang-soang pura kahyangan sawewengkon desa macang, kalugra madruc sukretan dirin diri, nanging tan dados singsal ring sukertan desa macang.
13. Pura kahyangan tan wenang anggen sejabana ngelaksanayang upacara agama hindu manut sastra agama ring bali. Yan wenten mabukti mamurug sang melaksana kewangdeang, tur pekardin nyane kapuceh, saha sang ngalugrahin kedanda manut pamutus perarem desa, maweweh ngawentenang upacara panyangaskara pabresihan.
14. Yan wenten macihna anak wiadin sang sapa sira ugi katedunan utawi kapangluh sajeroning pura kahyangan sawewengkoning desa macang, mabebaos minangkenang pangendikan ida ratu sasusunan utawi betara, ring gelis tunasang tirta leluputan mangda gelis udep. Prade sasampun kaketisin tirta kantun ngatemel masere masero, ngawetuang sumandea kayun pemaksane, irika patut pintonin ambilang toya apane celebang limannya makekalih. Yan mabukti tan belus nyandang gega pangandikaan betara. Yen sane belus tan nyandang gega gelisang gingsirang genahang mangda doh saking pura punika.
15. Sang sapa sira ugi krama desa jagi nganggen wantilan pura kahyangan, yogia polih palugrahan saking prajuru desa minakadi pamaksan pura, yan wenten mamurug prasida kewangdeang.

Kaping 5

Indik Cuntaka miwah Sosot

Pawos 33

1. Sang sapa sira ugi krama desa sane kahanan cuntaka, tan wenang ngranjing ka pura kahyangan ka penyucian kalaning nyuci gening minakadi genah saluiring genah sane kinucap suci pingit. Tan wenang ngaryanin saji saluiring saji sane pacang katur kasanggar tawang sekadi suci gening minakadi banten saluiripun sane jaga katur ka pura miwah sane katur ring pitra pindha. Sajawaning banten sane pacang katur ring Dalem, Prajapati, panguluning setra dados karyanin ring umah sang cuntakalaning mangupakara sawa.

2. Luir sane kinucap cuntaka:

Ha. Anak istri kalaning ngraja swala, suene cuntakane saking ngawit ngraja swala ngantos nyat macihna sampun malukat.

Na. Sang nganten lanang istri suene cuntaka, ngawit saking rahina pengantenane wiadin rahina merangkate kantos puput mebiakayon saha semayut prayascita amelukat metirta.

Ca. Ramarena cuntaka sangkaning madrue oka. Sane lanang cuntaka suene saking embas okane alit, kantos kepus odel nyane raris malukat. Sang istri pinaka rena, cuntaka petang dasa dina saking wawu embas rarene. Yan anak istri cuntaka sangkaning karuron, pateh ring cuntaka ngembasang oka, sane lanang cuntaka tigang rahina, saha sampun malukat.

3. Cuntaka melarapan antuk kasedaan, kepatian:

Ha. Yan sang ngarepin minakadi sang magenah sajeroning karang pomahan sang seda suene cuntaka pinih sue solas rahina saking wau seda, kantos puput panglemek karyane, punapike mapendem napi malih yan atiwa-tiwa. Macihnayang punah cuntakane antuk marerebu utawi masesapuh manut drestane.

Na. Sang polih ninjo, ngarap sawa, ngamel saha ngarembat saeteh-etch upakara pulapalining sawa, cuntaka adina, punah cuntakane macihnayang antuk malukat.

Ca. Sebel karang dados margiang saking ngawit negtegang daging kantos Ida Bhatara masineb. Wawenangan sebel karang among ring Sang magenah sajeroning karang sane kacuntakan. Yan wenten seda dados pacang ngemargiang sebel karang, patut pendem makingsan kalaning wengi, tan polih penyanggran desa, sejaba Sang patut tan dados pendem.

Ra. Yan sang polih nyembah sawa mangan paridan sawa, punika taler kabaos cuntaka, punah cuntakane sesampun usan marerebu.

4. Cuntaka sangkaning melaksana mamitra ngalang. Suene cuntaka selamine mamitre ngalang.

5. Anak wetu sangkaning mamitra ngalang utawi tanpa widi widana pawiwahan babinjat punika taler cuntaka, suene cuntaka selamine durung wenten meras, wiadin nuduk bangkenin pianak, utawi nganggen dadaman.

6. Cuntaka sangkaning mabukti madrue panyungkan sane tan sida waras selamine, kadi angganing ila buduh, ngawijilang reged saking: silit, baga, purus, tan enap

- mameres, berung borok tahunan mabanyeh, miwah saluir punika. Suenne cuntaka, selamine tan waras
7. Cuntaka sangkaning cedangga punika tan kawenang napak palemahan panyucian genah nyuci gening.
 8. Yen wenten sinalih tunggal sang cuntaka antuk ngraksa sawa wiadin layon, memamah utawi makayun ngarahin karya ayu atma wedana minakadi mabakti ring sang wenang kabktinin, dados, nanging tan wenang ngarebat, nyuun, ngamel, saupakaran puspa lingga.
 9. Yan wenten sinalih tunggal krama desa durung tutug cuntaka kadi ucapi ngarep, mamurug larangan, yan wenten ngatengahang ka desa, prajuru desa niwakan pamidanda, yogia sang mamurug marisuda sakabuatan manut panglokika.
 10. Yan wenten sinalih tunggal anak istri sangkaning tan meharajaswala sesampun ring pura, wiadin genah laranganne saosan raris kacirenan, wenang katiwakin danda tan meha, yogia marisuda genah punika, katulung antuk pemaksan pura wiadin pangempon soang.
 11. Yan wenten sinalih tunggal krama desa, kacuntakaan antuk ngraksa sawa, wiadin layon, napkala pagilih pagantosan ngaci- aci ring sinalih tunggal kahyangan desa, pacaruan ring desa, sadurung tutug sengker cuntakannia, wenang tan tedun mayahan, tandinosan nanging yan wenten pasadok sang cuntaka ring prajuru desa. Yan wus tutug cuntakane, patut nareteg yan karingalan tur patedunanne. Mungguing piturunan, wawijilan daging saluir ipun yogia kataur maētang pangarga.
 12. Yan cuntaka gamia gamana, prajuru desa ngantosang pamutus sang amawarat. Yan sampun wenten pamutus saking sang amawabumi, ring desa katiwakan danda kadi ring sor puniki, luire: mangda marayascita raga, genah malaksana, kahyangan desa, miwah desa pakraman. Prade yan sang katiwakan pamidanda mamandal, prasida desa sane marayascita desa miwah kahyangan, sang mamandal kabaosan ring desa, kicen pamutus antuk prajuru desa, manut pamutus pararem desa,
 13. Cuntaka sangkaning mabukti salah timpal, cuntaka ragan sang malaksana. Miwah desa pagenahania, tutug cuntakania yan sampun sang malaksana marayascita panyangaskara raga malaksana, desane marayascita desa. Buron sane kaanggen somah kapademang tur katanem.

14. Anak luh beling tan kapariangken antuk lanange suenne cuntaka kantos wenten pangupakara panyangaskara kulawisuda, anake istri beling mawidiwidana pawiwahan masanding keris pinaka linggan sang kadalih.
15. Anak luh beling tan kapariangken suenne cuntaka kantos lekad rarene saha wenten pangupakara kulawisuda.
16. Yan wenten anak macihna nyolong semara, cuntaka pateh ring cuntaka gamia gamana.

Pawos 34

Indik Sosot

- Ha. Yan wenten sinalih tunggal pacang naur sosot wiadin punagi, saluiring punagi, gumanti sane patut anggeni megat sot, tan dados naur sot yan tan kalaning dina piodalan batara. Ngadasa dinayang aci-aci, sang pacang naur punagi patut sampun masadok ring pamangku pura, yan ring kahyangan desa panauranne masadok ring pamangku desa miwah prajuru desa. Panauran punagi ika, wawu kalaksanayang yan sampun puput pangodale.
- Na. Yan wenten sinalih tunggal naur sesangi pacang ngaturang pangodal ugi mangda ring dina pagantosan piodalanne. Sang naur punagi, wenang nunas kanti patulung karya ring pamaksan pura. Sang naur sesangi nyukserahang daging nyumek saprabeaning pangodal ring pamaksan pura.
- Ca. Yan wenten sinalih tunggal naur sasangi maturan suaran tangguran saluiring tetabuhan, sasolahan, minakadi saluir ipun, mungguing prabea punika sami kaangganin antuk sang masasangi.
3. Aturan:
Yan wenten sang sapisira ugi ngaturang jinah, muang sarupaning barang punika sami patut kaunadikayang antuk prajuru desa, kliang pamaksan pura soang-soang mangda kasidan masuara ayu, aturan punika ungguhang jeroning lekita.
4. Sasarin canang:
sasampun puput pangaci-aci pujawaline, sesarin canang punika kapupulang saha kawilangin antuk prajuru desa, kliang pura, indik tatiwak kalih mamargin ipun sangkaning jati nirmala.

Palet 2
Indik Resi Yadnya
Paos 35

1. Krama Desa Macang yogia ngawerediyang kaprayadnyan kautaman sang hyang aji, asewaka nunas pawarah ring sang maraga widagda pradnyan, pingajeng ring sang kasinanggeh guru loka.
2. Prajuru desa, kliang banjar, ngutsahayang kaweredian kamuruban sang hyang aji, ngawentenang pasamuhan sesamuhan, parembukan, pinaka genah krama desa mamangguhang pawarah-warah ayu.
3. Kalaning dewasa ayu, wenang desa atirta wreyatra, wenang desa ngaturang punia miwah resi bojana ring ida sang maanga sulinggih, taler kalaning karya utama ring desa, saluiring karya sane kaputus antuk ida sang maangga sulinggih patut ngaturang punia. Asapunika taler ring sang mapitulung patut mawèh dana.
4. Sang sapisira ugi krama Desa Macang yan mapakayun pacang mapodala taler mangda wenten pasadok pamiuning ring prajuru desa sajaba patute polih palugrahan saking guru wisesa.
5. Prajuru Desa Macang mamanut pisan, yan krama desane mapunia ring sang pradnyan, ring sang widagda, ring sang satata ngrajegang darma, ping ajeng ring ida sang maanga sulinggih pasuriannyane soang-soang.

Palet 3
Indik Pitra Yadnya
Paos 36

1. Pamargi ngupakara sawa, ugi manut linging sastra agama hindu. Wenten makudang-kudang soroh, sakadi inucap ring sor puniki:
Ha. Mapendem ring pratiwi.
Na. Makinsan ring geni.
Ca. Atiwa-tiwa, utawi palebon, utawi ngaben.
Ra. Yan rare durung makupak untu, wus kepus odel antaka, wanang ngangge pangentas bangbang masadana klungah kelapa gading, ngaran ngalungah, tan wenang tiniwaken.

- Ka. Yan rare durung kepus odel antuka pamaling aran, pendem jugatan ana pangupakarania kewala gantên utawi adem paican ida sang maangga sulinggih.
2. Sang sapisira ugi krama Desa Macang tan kawasa makta sawa ka desa pakraman, yan sawa ike sampun keni pangupakara sawa. Yan wenten mamurug yogia katiwakan danda, mrayascita, masisudha desa.
 3. Saluiring upacara atiwa-tiwa, palebon, ngaben, ring setra ugi kawenangannia tan wenang ring desa pakraman. Yan wenten mamurug wenang danda marisuda desa, krama desa sang atatulung danda arta manut maputus pararem desa saha mrayascita desa.
 4. Yan wenten krama desa ngurung sawa macamana, mabresih, kawenangannia, tan kalugra kalintangan ring petang dasa kalih dina ngawit dina sedane. Yogia murnama tilem miwah saluiring upacara rerahinan. Yan kalaning angurung sawa, sajroning Desa Macang ngawangunang karya agung ngantos nyuci geni, luire matabuh gentuh, batara turun kabeh, karya agung ring besakih, yogia tumpang salune tedunang saking balene, genahang ring natah umahe, saking betara kodal kantos ida masineb. Hal 45
 5. Tan wenang nyekeh sawa yan masamana, mabresih, lintangan ring roras dina ngawit saking dinane seda. Yan wenten mamurug danda gung arta manut mamutus pararem desa.
 6. Sang sapisira ugi krama Desa Pakraman Macang tan wenang atiwa-tiwa miwah masawa rikalaning aci-aci ring pura kahyangan tiga, kahyangan desa, miwah kahyangan saosan saking mitung dinayang aci-aci kantos batara masineb. Sawa inucap patut karaksa ring pakaranne, utawi kapendem, nanging tan dados mendem sawa kala rahina piodalanne.
 7. Yen wenten ngraksa sawa rangkungan ring kalih rahina, sang madrue sawa punika patut midabdabin sawa punika, mangda nenten maambu kawon.
 8. Sang sapisira ugi krama Desa Macang tan wenang nginepang utawi ngawangdeang bangbang ring setra desa pakraman yan wenten mamurug kadanda manut pamutus pararem desa.
 9. Yan wenten krama mendem sawa kalaning dina larangan, kawasa, nanging ugi masawen, durung maagumuk, lakukinsan ngaran sesampune polih palugrahan saking prajuru desa.
 10. Yan makinsan ring geni, sawa gineseng, asti ginanyut, manut krama. Yogia ngangge tirta pammersihan. Mungguing dewasa sasor ipun dewasane dados marginin.
 11. Indik padewasan:

Ha. Yening wenten krama desa pakramanne madue kaptian patut masadok ring keliang Desa Macang.

Na. Padewasan mendem ring pratiwi utawi makinsan ring geni wenang katiwakang antuk prajuru desa pakraman manut suba dewasa.

Ca. Padewasan atiwa-tiwa katiwakang antuk ida sang maangga sulinggih sane pacang muput, yogia sampun kaptut antuk prajuru desa.

1. Indik larangan ngupakara sawa, sajaba unggahang katumpang salu, sane kamanggehang sajroning Desa Macang, luire: kala gotongan, semut sadulur, purnama, tilem, pasah, tanggal, panglong, ping, molas, ingkel wong, yan wenten mamurug danda gung arta manut pararem desa, saha mrayascita desa.

2. Tan wenang ngulung, teges ipun, sajroning setra tunggal, tan dados mresihin sawa nuju dina pangutangan yan ring setra punika wenten ngalaksanayang pangabenan. Yan wenten mamurug patut kakenenin danda manut pararem desa.

3. Yan wenten mendem sawa langkungan ring adiri sajroning desa pakraman Macang sampun puput maurug sane pangawit wawu dados mamargi ka setra saosan.

Ra. Sang sapisira ugi krama Desa Macang, tan kalugra mendem sawa, masmi sawa miwah atiwa-tiwa sajroning Desa Macang, kala dina: wrespati wage miwah sukra kliwon sungsang, anggara wage, buda kliwon, wrespati umanis, dungulan. Sukra wage saniscara kliwon, kuningan, miwah redite umanis, langkir/wuku kulantir. Yan kalaning buda wage wenten pangaci ring paibon utawi pajenengan, kalaning wuku pahang, yan ngaturang piodalan ring Pura Batu Madeg. Miwah kalaning rerahinan jagat saosan, sakadi saraswati.

12. Yan wenten sawa tan kapariangken ring wawengkon Desa Macang ingaranan babedag desa wenang pendem ring setra pangilang-ilangan, sesampunne polih lugra asaking sang amawarat.

13. Yan sawa sangkaning salah pati, angulah pati, mati kapangawan, minakadi saluir ipun, desa tan ngalarangin, yan sawa punika tiniwaken pramangkin. Sara ledang sang madrue minakadi ida sang maangga sulinggih sane macang muput.

14. Yan wenten sinalih tunggal sawa, genahe seda wiadin padem, sajabaning karang paumahan, luire: ring tegal, ring carik, pura, pasar, banjar, sekolah, minakadi genah saosan dudu karang paumahan, yogia sang madrue wirange marayascita marisuda genah punika. Yan sawa tan kapariangkenan, genah punika patut kaparisuda kaprayascita antuk sang madrue emponan.

Paos 37

Indik Angatma Wedana

1. Sang sapisira ugi krama Desa Macang yan kalaning angatma wedana luire: ngaroras, patileman, baligia, tan wenang ngawangunang payadnyan, petak ring palemahan pura kahyangan desa minakadi saosan.
2. Sang sapisira ugi wus ngawangun karya pangatma wedana, yogia karang payadnyan punika kapralina, sakasepipun petang dasa kalih dina saking dina karyane.

Palet 4

Indik Manusa Yadnya

Pawos 38

1. Sang sapisira ugi krama Desa Macang, ngawangun saluire upacara manusa yadnya tan wenang magenah ring wawidangan palemahan kahyangan panyiwian desa. Yan wenten sinalih tunggal mamurug, wenang danda marisuda marayascita pura punika.
2. Sane kalugra mawinten magenah ring pura sinalih tunggal luire: krama desa murwa sang sapisira ugi krama desane pacang kaadegang pamangku pura kahyangan inucap. Taler sane kaadegang pinaka prajuru desa wenang mawinten, majaya-jaya ring pura puseh Desa Macang.
3. Indik manusa yadnya sane dados kamargiang sajeroning Desa Pakraman Macang ugi sane nganutin dresta kuna minakadi sastra agama.

Palet 5

Indik Bhuta Yadnya

Paos 39

1. Sajeroning Desa Pakraman Macang pacaruan manut ungguan, kalih sor singgih luire:
Ha. Caru runtutan banten pangaci aci, manut agung alit banten pangacine.
Na. Caru ring Pura Dalem marupa pacaruan panca suda panca durga luire:
ayam amanca, banteng, asu bang bungkem, miwah bawi butuhan. Ring

paumahan pagenahan mamedri ring soang-soang palinggih raris ring usaba ring dalem kabasmi rikalaning Tilem Sasih Pitu.

Ca. Caru tawur Kasanga pacaruan punika kamargiang ring Catus Pata wenten kalih paledan, luire:

1. Ngawarsa kamargiang caru balik sumpah nista luire: ayam amanca kadulurin antuk angsa magenah ring kangin lan asu bang bungkem magenah ring kelod kauh,

2. Ngalimang warsa kamargiang caru balik sumpah madya luire: Ayam amanca, kadulurin antuk banteng kelod asubang bungkem bauh, bawi butuhan kaler, angsa kangin miwah bebek mabulu sikep ring tengah, taler kasarengin batara turun kabeh mamanggung ring catuspata malinggih pitung rahina

Ra. Pacaruan desa padgata kala, rikala jagate babrebehan, kageringan, kadurmanggalan, katiben panca baya, miwah sane saosan sane patut carunin.

Ka. Agung alit caru, manut anggwan pacaru babuatan pacaruan, kalih nista madia uttamaning caru.

2. Pacaruan ring pura kahyangan, pamrajan dadia, saluire, manut drestan pura soang-soang minakadi awig-awig gagaduhan pura inucap.

3. Yan sinalih tunggal pura kahyangan, saluire reneng pangodale kantos tigang plabuh, wenang prajuru desa mamaosin. Yan wus puput babaose, yogya maguru piduka, ngawit masesapuh mangda kasidan ngaturang pangaci-aci.

Satu Sargah

Sukreta Tata Pawongan

Palet 1

Indik Rangkat

Pawos 40

1. Indik rangkat punika, manut desa kala patra, muang sima dresta sane kapatutang tur katinutin antuk krama desa soang-soang, tan singsal ring uger-uger panagara luire:

Ha. Papadikan.

Na. Ngangorod.

Ca. Ngunggahin.

2. Sajroning desa pakraman macang, indik rangkat punika yan sampun mawidi widana pawiwahan, sanistania mabiakaon tur malukat, saha kasaksinin antuk prajuru desa rangkat punika kasinanggeh puput palikrama.
3. Yan wenten anak istri krama desa pakraman macang karangkatang antuk sang sapa sira ugi napi malih antuk anak saking dura desa, yan kantos arahina ring awengi saking dina matinggale saking jumlah tan wenten pajati, yogya sang madue wirangi nunas kanti ring prajuru desa macang mangda ngamargiang saserepan. Yan sampun sinah genahnia, ngraris ngamargiang panegteg, tan kawasa makta sahananing sanjata saha nunas kanti ring sang amawerat.
4. Sang sapa sira ugi krama desa macang, yan kerauhan tamiu praya masinutan malarapan antuk ngerorod, ugi mangda masadok miuningang ring prajuru desa, prajuru desa yogya mariteges, yan sangkaning tan patut pamargi rangkatnia, prajuru desa nguduhang mangda katur ring sang amawerat. Yan wenten mamurug danda gung arta manut perarem desa.
5. Yan wenten sinalih tunggal krama desa macang ngamet anak istri antuk mlegendang (hal 50)mamendet, marikosa miwah saluiripun, tan sangkaning sami demen, tan yogya pinuput widi widana pawiwahania sedurung wenten pamutus saking guru wisesa.
6. Yan wenten sinalih tunggal saking dura desa, pacang muput rangkat kawewengkon desa macang sang madrue wirang luh, yogya nunas pasaksi ring prajuru desa macang sinalih tunggal mangda wenten ngerauhin.
7. Yan wenten sinalih tunggal krama desa macang ngamet anak istri pinaka rabi tan manut sima dresta minakadi sastra agama, yogya katur ring sang amawerat mangda kabaosan saha polih pamutus.

Pawos 41

1. Prade wenten anak lanang mobotin anak istri sane sami-sami durung madrue rabi tur sabda kapariangken, prajuru patut ngutsahayang sang kalih mangda majangkepang saha mawidiwidhana pawiwahan sakadi patute.
2. Prade sinaling tunggal tan satinut kapajangkepang patut mrayascita desa tur wicarania katur ring sang amawerat.
3. Yan sinalih tunggal sampu madrue rabi wicarania katur ring sang amawerat antuk wirangnia.
4. Yan wenten anak istri mobot ten wenten ngangkenin patut:

Ha. Sang kadalih mobotin tan kapariangken, miwah sang bobot madewa saksi ring pempatan agung, kasaksinin antuk prajuru desa. Sasampun madewa saksi patut ngamargiang pamrayascita ring wewidangan Desa Macang, mungguing prabeami kaangganin antuk sang kalih.

Na. prade wenten anak sios ring sang kadalih mobotin, ngangken madue pakaryane wenang sang mariangken punika sareng madewa saksi tur sasampune puput padewa saksine sang bobot, sang kadalih miwah sang mariangken sareng mobotin mrayascita desa, sasampun punika bobotan anake istri kaupacarayang saha sang kadalih kalinggayang antuk keris.

Ca. Prade sang patut madewa saksi tan satinut ngamargiang padewa saksi, sang mobot utawi wirangnia patut ngaturang wicara punika ring sang amawarat.

Palet 2

Indik Belas Makurenan utawi Nyapiang

Paos 42

1. Sane kabaos nyapiang pinaka sang palas marabi, palas makurenan, sane sampun katiwakan pamutus antuk guru wisesa minakadi sampun kakerabang ring sangkepan Desa Macang.
2. Yan wenten sinalih tunggal krama desa, ngrangkatang sapian, sadurung tigang sasih utawi, 105 dina saking dina palase, yogya sang karangakatang sapian punika keni dangda gung arta manut pararem desa.
3. Krama desa sane belas makurenan, sasampune polih pamutus saking guru wisesa patut masadok miuningang ring keliang banjar, mangda kadamiakang ring banjar ring desa sakasepipun asasih saking palase.
4. Tata cara palas marabi:
 - Ha. Yan wenten krama desa sinalih tunggal mapikayun pacang malas marabian patut matur supeksa ring prajuru, prajuru patut maritetes, kaicen tatimbang mangda prasida setata adung marabi.
 - Na. Sang sapisira ugi madue oka istri sampun marabian, mantuk sangkaning ngambul, sajeroning tigang sasih utawi, 105 dina saking dina ngambule patut matur supeksa ring prajuru desa, prajuru desa maritetesin saha kicen tetimbang mangda setata adung malih.
 - Ca. Yan tatimbang prajuru desa tan katinutin, wicaranya dados kalanturang ring sang amawarat.

5. Yan wenten krama Desa Macang ngrangkatang sapian, sane durung madue lekita belas makurenan saking sang amawarat, yan pet prade wenten pangiadin rabine nguni minakadi wirang rabine nguni, wicara punika patut katur ring sang amawarat.
6. Yan wenten anak istri wit saking wawengkon Desa Macang, nyapian mawali ka karang daa, yogya sang madrue wiring matur supeksa ring prajuru desa. Saha mrayascita marisuda anake luh punika. Yan tan kaparisuda antuk wirangnia, patut marisuda raga, mangda kasinanggeh nirmala.

Palet 3

Indik Balu

Paos 43

1. Sane kabaos balu, anak istri katinggal seda antuk rabine, yan anak lanang seda rabine, wiadin katinggalin nyapian taler kawastanin balu,
2. Yan wenten lanang balungatengku karang madue oka istri sampun antes maayahan yogya maayahan mulangkepin bapa utawi ajine
3. Yan wenten anak istri balu ngawengku karang madue sentana utawi oka lanang sampun antes maayahan, yogya maayahan mulangkepin biangne.
4. Yan wenten sinalih tunggal anak istri balu, marabian, yogya rangkat punika kapuputang antuk warang lakine riin, yan bebaos punika kari pageh.
5. Mungguing wawenangan bebaos luh utawi rangda, ring indik wewarisan, minakadi sane sos paosan, luire:
 - Ha. Miara lan muponin wewarisan sakantun pageh ring rabine
 - Na. Tan dados ngadol, ngadeang, utawi makidihang wewarisan ring sapisira ugi, sadurung polih palugrahan saking waris kapurusa
 - Ca. Prade balu sane pageh nganutin swadarmania, raris katundung olih waris rabine, balu inucap patut matur supeksa ring prajuru, prajuru patut mamaosin ngicen tetimbang, yan tetimbang prajuru tan katinutin sinalih tunggal dados nglanturang wicarania ring sang amawarat prade pamutus sang amawarat patch sareng tetimbang prajuru desane, sang ngaturang wicara ring sang amawarat keni danda manut pamutus pararem desa.

Palet 4

Indik Sentana

Paos 44

1. Sajeroning Desa Macang, ngrajegang pidabdab sentana kapurusa siddi kara tunggal, paperasan tunggal dadia
2. Prade pawiwahan tan ngawentenang sentana, kengin ngedih sentana antuk upasaksi sekala niskala sane kawastanin sentana paperasan.
3. Sang sapasira ugi krama desa meras sentana, nuduk mantu kasinanggeh sampun puput palikrama polih lugraha saking kapurusa, yogya sangkaning radin, mawidi widana paperasan, kasaksinin antuk prajuru desa kasiarang ring paruman, tur sampun wenten lekita pamikukuh saking sang amawarat.
4. Sane dados kaperas kaanggen sentana kadi ring sor puniki:
Ha. Anak sane maagama Hindu.
Na. Papernahan nedunang saking waris kapurusa, tunggal dadia, tunggal sidikara.
5. Makidihang raga, inggih punika sinalih tunggal krama desa tan madrue sentana utawi camput, nyukserahang raga ring sang kantun wenten pakilitan pasemetonan sane rajeg magama Hindu.
6. Indik meras sentana nuduk mantu, sesampun puput upacara manut sastra agama Hindu kalanturang ngrereh lekita ring guru wisesa.

Palet 5

Indik Wewarisan

Paos 45

1. Luire sane wenang kawarisin:
Ha. Among-amongan ring desa, ayah-ayahan saurah arih.
Na. Utang piutang sang ngawarisang.
Ca. Saroja drue, brana, tegal, tetamian, sakancan kasugihan.
2. Sane wenang ngawarisin.
Ha. Manut lelintih paprenahan adoh tampek saking purusa tunggal sidikara, tunggal dadia.
Na. Putra dadaman wiadin putra paperasan.
Ca. Mantu dadukan, minakadi sentana saking nuduk mantu.

- Ra. Sang katrimenan wewarisan saking sang makedihang raga, sane patut katrimenang.
3. Sang sapasira ugi krama desa Macang, yan tilar saking agama Hindu, tan yogya ngewaris sane kamulan patut warisin.
 4. Ngedum warisan kapatut pinih sor sesampun puput maabenang sang ngewarisang brana kalih kasugihan punika. Sane dados dum sajaba sane mangge padagingan pangaci-aci minakadi saluiring sane mangge piranti nglaksanayang upacara agama, pustaka-pustaka sane kapingitang saluiripun.
 5. Pah-pahan wewarisan kadi ring sor puniki
Ha. Sane lanang polih ategen
Na. Sane istri polih asuun, among muponin kewanten.
 6. Sang patut ngawarisang kengin mapaweweh rikala kantun maurip ring akasa ne pacang kesah marabian marupa pitemes sane dados kawarisang pinih akeh a pah tigayan saking paduean nyane makapiolih olih pagunakaya.

Sapta Masargah
Wicara lan Pamidangda
Palet IIndik Wicara
Paos 46

1. Saluiring wicara indik pakraman, ring wewidangan Desa Macang wenang rinawosan antuk prajuru desa. Yan tan sida puput, prajuru desa ngaturang ring guru wisesa, buat matetimbang.
2. Yan wenten wicara indik pakraman, pamaksan, subak, sakadi sekaa-sekaa soasan, yogya kabaosan antuk prajurunia soang-soang, yan tan kasidan puput wenang katengahang ka desa, prajuru desa yogya mamaosin.
3. Indik nepasin wicara inucap tan maren ngupadi darma kawelas asihan, tur malarapan antuk, lekita, bukti, saksi, saha tan maren mangda nepek ring sadaging awig-awig, pasuaraan pamutus pararem desa.
4. Yan pamutus wicara sane katiwakang antuk prajuru desa Macang tan katinutin utawi tan kairing antuk sang mawicara, wenang sang mawicara nunasang pangrawos ring sang patut maosin, ring guru wisesa.
5. Yan sang mawicara tan tinut ring pamutus wicara sane katiwakang inucap ring ajeng, risampune patch pamutuse sareng saking guru wisesa prasida sang mawicara kakenenin danda manut pangangan beras, 50 kilogram.

Palet 2
Indik Pamidangda

Paos 47

1. Luring pamidangda sane wenang katiwakang antuk prajuru desa, banjar, pamaksan, subak, sekaa-sekaa sawewengkon Desa Macang sekadi ring sor puniki:
Ha. Danda arta
Na. upasaksi, dewa saksi, pangrarata, sumpah.
Ca. Danda panyangaskara luire: mrayascita, marisuda, miwah saluiripun
Ra. Kasepekang saha kaeladang
2. Patiwak pamidangda, manut ungguan wicarane soang-soang minakadi werat ringan wicaranipun, luire:
Ha. Yan wicara ring desa pakraman yogya kapidanda antuk desa mungguing dedandan mantuk ka desa.
Na. Yan wicara ring banjar pakraman, matiwakin pamidangda ring banjar ika, dedandan mantuk ka banjar.
Ca. Yan ring subak ring sekaa-sekaa, katiwakin pamidanda ring kuu tempeknia soang-soang, mungguing dandan mantuk ka jero kuu tempeknia.
3. Agung alit dedandan manut panglokikan agung alit werat ringan kasisipane sane mungguh ring awig-awig gagaduhania soang, minakadi pasuara pinaka pamutus paruman.

Asua Masargah

Nguwah-nguwuhin Awig-awig

Paos 48

1. Sane wenang uwuhin uwahin inggih punika pasukerta pamutus pararem, wiadin pamutus paruman miwah sane soasan sapanunggilan ipun
2. Indik nguwahin kalih nguwuhin pasukertan, pasuara, pamutus pararem miwah sane saosan manut tata kramaning pasamuhan.
3. Indik nguwahin kalih nguwuhin awig-awig, manut tata kramaning pasamuhan, sasampun nunas tetimbang ring guru wisesa kalih polih palugrahan sang amawabumi.

Nawa Masargah

Pamuput

Paos 49

1. Awig-awig puniki mawasta awig-awig Desa Pakraman Macang
2. Awig-awig puniki pinaka bantang sahananing awig-awig, pasuara, pasukertan, miwah saluiripun sane wenten sajeroning Desa Pakraman Macang.
3. Banjar, kahyangan, pamaksan, subak, sekaa-sekaa sane wenten sajeroning Desa pakraman Macang, wenang ngawangunang awig-awig pasukertan, pasuara, gagaduhan soang-soang, nanging dagingipun tan yogya singsal tungkas ring awig-awig desa Pakraman Macang
4. Saluiring sane durung mungguh ring awig-awig puniki kaunggahang sajeroning pasuara, pamutus paruman Desa Pakraman Macang.
5. Dresta kuna sane kari dados angge, yan tan tungkas ring daging awig-awig Desa Pakraman Macang, manut kajari sastra agama Hindu anut ring uger-uger Negara saha kaputusan sajeroning paruman Desa Pakraman Macang
6. Awig-awig Desa Pakraman Macang, pawangun Desa Pakraman Macang, kapastika manut upacara Agama Hindu, kala dina,, wuku, sasih....., tanggal, pi, ..., rah,, tenggek, ..., isaka,, magenah ring Pura Batu Madeg Macang kapuput antuk Ida Sang maangga sulinggih saking griha....
7. Awig-awig puniki kalingga tanganin antuk prajuru desa luire: Keliang Desa, saking keliang desa, penyarikan, juru raksa, saha kasarengin antuk keliang banjar pakraman kasaksisnin antuk kelian banjar dinas macang lan banjar Triwangsa Macang, perbekelan Desa Persiapan Macang, Camat Bebandem, Kekukuhang antuk Bupati Karangasem.
8. Awig-awig puniki kalaksanayang ngawit dina:, kantos salantur ipun.

9. Luir sang ngalingga tanganin:

Ha. Kapratama: Prajuru Desa Pakraman Macang.

Kelian Desa Pakraman Macang

Saing 1. Desa Pakraman Macang

Dokter Hewan, I Made Sibang, S.S.

I Wayan Winda

Saing 2. Desa Pakraman Macang.

Panyarikan Desa Pakraman Macang

I Wawan Dangin

I Ketut Dangin

Juru Raksa Desa Pakraman Macang

Kelian Banjar Desa Pakraman Dukuh

I Nengah Ramesma

I Gusti Gede Jumutan, SH

Kelian Banjar Pakramana Sirang

Makasaksi: Kelian Dinas Banjar Macang

I Nyoman Kawi

I Made Alit

Keliang Banjar Dinas Triwangsa Macang

Perbekel Desa Persiapan Macang

I Gusti Ketut Megeng

I Made Putu Sigiana

Camat Bebandem

I Ketut Adra, BA

Kalakitayang ring kantor Bupati Karangasem, duk rahina, tanggal masehi, register nomor:

Bupati Karangasem

I Wawan Geredeg